

## LUGUBRE MUSARUM PEPLUM

Super Beata Analyfi

VIRI

MAGNIFICI AMPLISSIMI NOBILISSIMIQUE

DOMINI

D<sup>n</sup>. GEORGII  
HÜBENERI,

S. R. M. Poloniarum Burggrabij

Præ-Conf. Reipubl. Thorunen. &amp; Protoscholarchæ,

*A. O. R. 1700. d. II. Novemb. vita & muneribus defuncti,**& die 21. Dormitorio illati, ipso Exequiarum die**inter Lessus & Suspiria repræsentatum*

a

Tanti PATRONI cliente

GREGORIO FORK

Thorunensi.

*Phil. & S. S. Theol. stud.*

\*\*\*\*\*

*Thorunij in Typographia Magnifici & Nobilissimi Senatus.*



**D**Um consecrata memoriæ Martini celebritas redijt,  
dumque usitato Majorum more solenni cantu pera-  
gitur, simul in auribus nostris resonat lugubre illud ac  
acerbum melos, quod de fatali obitu **MAGNIFICI**  
**HUBENERI** sparsus per Civitatem rumor ad eas detulit. In-  
gens dolor exulcerati temporis diritatem auget, atque attonita  
recenti luctu pectora acuto morfu lancinat & depopulatur. Du-  
rus sit, qui hoc casu non moveatur, quemq; nec pullata **PRO-**  
**CERUM** Civitatis Facies in societatem doloris adducere possit.  
Qui animo & scrutinio prudenti considerat mortem Magnorum  
Virorum, quosq; ut Atlantes venerati sumus, argumentum esse  
fortunæ ad ruinam declinantis, fatebitur ultro, & hunc lugubrem  
Magnifici Hubeneri ex hac vita excessum justum mœrorem nobis  
indixisse. Summus humanarum rerum Arbiter jussit eum pone-  
re Corporis Exuvias, cum enim ejus indulgentiam commissa si-  
ne intermissione delicta fatigarunt, sua bona perpetua nobis esse  
non patitur. Non adducam omnem Titulorum & Munerum  
Pompam, sed saltem ingemisciente calamo ingeminabo, **PRO-**  
**TOSCHOLARCHAM** fato concessisse. *Protoscholarcham* de-  
ploramus, per quem suis studijs constitit honor, *Protoscholarcham*  
inquam, id quod nobis dedit largam doloris materiem. Multa e-  
rant Supremi Numinis Charismata, quibus Hubenerum muneribus  
& vita defunctum conspicuum esse voluit, & singulariter or-  
natum, quem enim Providentia Numinis ad Gubernacula Patriæ  
Civitatis admoveere decreverat, concessas a natura dotes mox ab  
ineunte ætate ita perfici voluit, ut fieret regiminis capax, & sci-  
entiæ scientiarum, quæ cœteras non minus præstantia, quam dif-  
ficultate supergreditur, quæ fortunas Civium salubriter atque ex  
æquo dispensare docet. Verum oratio mea multo inferior est  
tanto virtutum & laudum cumulo, nec potest bene gestorum  
vestigia passibus æquis sequi. Igitur esto aliorum munus, paria  
factis præconia meditari, Tutelam illam, qua Musas *Protoscho-*  
*larcha* excepit & fovit, intuebor, oculo quamvis ad hos radios  
caligante. Forte illa nutritia Aonidum cura *Protoscholarchæ*, si  
repe-



repetita fuerit intra animum, superesse adhuc aut saltem occasus  
ejus differri videbitur, imo averruncari, cum tam laudabilis, tam-  
que sancta nec satis digne deprædicanda virtus occidere non pos-  
sit. Memores beneficiorum Musæ mori vetant. Regia est, quæ  
plus vice simplici non saltem Consularem Purpuram ornavit, verum  
& cum sanguine Regio misceri voluit. Multi Principum, cum  
armis essent honestati, existimarunt non indignam esse Regio fa-  
stigio Gloriam, studiorum florem promovisse. Marte & Arte  
Principes, quibus hanc Gloriam Musæ retulerunt, ut memoria e-  
orum a communi oblivionis lege exempta sit, ipsique adeo inter  
mortales immortales esse possint. Philippus Macedonum Rex  
& fatalis Græciæ Triumphator, juvit opulentia sua Philosopho-  
rum conatus, ejusque auspicijs Aristoteles, Philosophorum sui  
seculi Phoenix, præclara de animalibus volumina condidit. Pro-  
didit hæc memoriæ Ælianus, a quo plerosque veterum dissentiri  
scio, qui Alexandro M. in acceptis referunt, quæ Ælianus Phi-  
lippi munificentia tribuit. Id expeditæ veritatis est, quod inter  
elogia Alexandri non tantum arma per orbem circumlata refe-  
rantur, quibus ille vastissimas Orientis opes aggressus est, sed &  
favor ingenuis exhibitus & decreti Philosophis honores. Ho-  
merus ei fuit in pretio, cumq; Thebas vastaret, noluit ædes Pinda-  
ri, Poætæ Lyrici, igne absumi, qui tamen cætera tecta incendio  
populatus erat. Iuvit conatus Stagiritæ, idq; effecit, ut absoluta  
subtilitatis Philosophus tantum cæteros anteiret, quantum ipse  
Alexander cæteros in Græcia Duces & Reges supergressus erat.  
Munera quæ & Eleo Pyrrhoni & Xenocrati obtulit, ingentia sunt  
& tanti Morarchæ fastigio paria. Alexandria, Metropolis Æ-  
gypti, opus Alexandri, in antiquis Annalium monumentis cele-  
bratur, non tantum quod Mercatoribus hospitium præbuerit,  
sed &, quod Musas benigne exceperit. Mercurij & Musarum in  
ea certamen fuisse dixeris. Claruit in hac Metropoli Museum, in-  
de Alexandrinum nuncupatum, in quo Viri docti eruditis me-  
ditationibus vacabant, & quibus munificentia Principum subsi-  
dia vitæ destinaverat. Nomen vero Ptolomæi Philadelphi im-



mortale est, quem Musei Alexandrini Conditorem esse affirmat Henricus Valle-  
 sius, in Annot. ad Amm. Marc. Hunc autem singularem studiorum Promoto-  
 rem fuisse, nemo est qui ignorat. Dionysio Sicilia Tyranno sævitia & crudelitas  
 in perennitatem famæ cessit, ea Gloria, qua Herostrato incendium Templi Dia-  
 næ, hoc tamen nomine laudandus, quod Platonem sapientiæ Antistitem in hono-  
 re & pretio habuerit. Poterant & ex recentiori ævo produci Musarum Prote-  
 ctors, quos fileo, cum illustria nomina lucis meæ non indigeant. Hoc modo Ge-  
 nerosum HUBENERI pectus animatum erat atque de bono publico merebatur,  
 cui cadentibus studiis ruinam imminere & Barbariem prudenter judicavit, inprimis  
 priorum temporum fata revolvens. Rem bene gessit PROTOSCHOLARCHA,  
 suoque Umbone dignatus est Musas Thoruniensis Parnassi, per Eum honor stu-  
 diis duravit, & vel hac sola cura Nomen suum æternitatis cædro consecrav-  
 it. Iamque quo majus erat bonum, quo nos vivus beavit, eo grandius vulnus esse in-  
 telligimus, quod ejus obitus nobis inflixit. Florebant Musarum laurus, nunc in lu-  
 gubres cupressus conversæ, adeo & in ipso Parnasso comploratum est. Me cer-  
 te, qui Tuorum clientum minima pars fui, Tuus abitus frangit & debilitat. Non  
 ita multi soles abiire, ex quo Splendorem Tuum, o PROTOSCHOLARCHA co-  
 ram veneratus sum, ubi animadverti post Deum in Tuo etiā Patrocinio felicitatem  
 meam fundandam fuisse. Volebas scilicet necessitatibus meis misceri & auxi-  
 lij indigo Præsidium esse. Supremum vero Numen pro sua voluntate res nostras  
 moderatur, Teque Fasces deponere voluit, unde spes mea lapsa esse videtur, & vo-  
 ta ac suspiria, pro Tua salute nuncupata, aliter, quam optavimus, ceciderunt.  
 Iustus ergo dolor, Reipublicæ Navigium Palinuro Musas Mæcenate, me Ever-  
 geta esse orbatum. Veruntamen, Cælum adhuc volvitur. Deus rebus no-  
 stris interveniat, cujus Gratia Successores Antecessorum æmulos excitat. Ita ex-  
 cipit Mosem Iosua, Eliam Elisæus, Davidem Salamo. TIBI jam o BEATE PRO-  
 TOSCHOLARCHA, ultimum pietatis officium exsolvo, nec tam thure quam  
 mola falsa lito. Nec mihi erit vitio, eo Te modo colere, quo possum. Requi-  
 esce in Domino, post exantlatos varios labores, recubent ossa molliter. Nec in-  
 grata oblivio, nec diuturnitas temporis destruet Colossos, & monumenta, quos  
 Tibi Virtus posuit. DEUS, cui res nostræ curæ sunt, inclinatam Patriæ salutem  
 erigat, & Magnificorum Patriæ PROCERUM consilia antevenire & subsequi  
 dignetur, sic constabit Fascibus Splendor, perennabit Civitatis salus, & studiis ho-  
 nor durabit. Sic in salute Procerum, quæ publicæ felicitatis compendium est cu-  
 jusvis propria felicitas invidendis successibus efflorescer.

### Inscriptio Sepulchralis.

*Clauditur angusto tumulatus marmore Consul,  
 Cujus vix famam Lechica Terra capit.  
 Cujus Thorunium sese jactavit Honore,  
 Hic jacet, Hic nobis non nisi morte gravis.  
 Et cum non data sit rebus perfectio nostris,  
 Longior huic tantum vita negata fuit.  
 Ast consummatus postquam nunc morte triumphat,  
 Jam data per mortem vita perennis ei.*

inv. 113 115

v. fol. 3 adl. 127